

## НЕДЕЛЯ ШЕСТАЯ ПО ПАСЦЕ.

### О СЛЕПОМ.

#### НА ВЕЛИЦЕЙ ВЕЧЕРНИ,

Поставим стихов 10. И поем стихиры воскресны 3, восточны 4, и два самогласна о слепце, повторяюще един.

Стихиры воскресны, глас 5-й:

**Ч**естным Твоим крестом, Христе, диавола посрамил еси, и воскресением Твоим жало греховное притушил еси, и спасл еси ны от врат смертных. славим Тя, Единородне.

**В**оскресение Даяй роду человеческому, яко овча на заколение ведеса, устрашишася Сего князи адстии, и взяшася врата плачевная, вниде бо Царь Славы Христос, глаголя сущим во узах: изыдите, и сущим во тьме: откройтесь.

**В**елие чудо, невидимых Содетель за человеколюбие плотию пострадав, воскресе Безсмертный, приидите отечествия язык, Тому поклонимся: благоутробием бо Его от прелести избавльшеся, в трех Ипостасях Единого Бога пети навькохом.

Ины стихиры Анатолиевы, глас тойже.

**В**ечернее поклонение приносим Тебе, Невечернему Свету, на конец веков, яко в зеркале плотию возсиявшему мірови, и даже до ада низшедшему, и тамо сущую тьму разрушившему, и свет Воскресения языком показавшему: Светодавче Господи, слава Тебе.

**Н**ачальника спасения нашего Христа славословим, Тому бо из мертвых воскресшу, мір от прелести спасен бысть, радуется лик ангельский, бегает демонов прелесть, Адам падый воста, диавол упразднися.

**И**же от кустодии научени бываху, от беззаконник: покрыйте Христово востание, и примите сребренники, и рцыте: яко нам спящим, из гроба украден бысть мертвый. Кто виде, кто слыша мертва украдена когда? паче же помазана и нага, оставльша и во гробе погребальная своя? не прельщайтесь, иудее, навькнете речением пророческим, и уразумеите, яко Той есть воистинну Избавитель міра, и Всесильный.

**Г**осподи, ад пленивый и смерть поправый, Спасе наш, просветивый мір Крестом честным, помилуй нас.

Ины стихиры самогласны, о слепом. Глас 2-й:

**С**лепый родивыйся, в своем помысле глаголаше: еда аз грех ради родительных родихся без очию? Еда аз за неверие языков родихся во обличение? Не домышляюся вопрошати, когда ноць, когда день? Не терпита ми нозе каменнаго претыкания, не видех бо солнца сияюща, ниже во образе мене Создавшаго. Но молю Ти ся Христе Боже, призри на мя, и помилуй мя.

[Дважды]

**М**имоходя Иисус от святилища, обрете человека слепа от рождения, и умилосердився положи брание на очию его, и рече к нему: иди умыйся в Силоаме, и умывся прозре, славу возсылая Богу. Соседи де его глаголаху ему: кто твои зеницы отверзе, ихже никтоже от зрящих изцелити возможе? Он же возопив рече: Человек Иисус глаголемый, Он ми рече, умыйся в Силоаме, и прозрех. Той есть воистинну, Егоже рече Моисей в законе, Христа Мессию: Той есть, Спас душ наших.

**Слава, глас 5-й:**

**Г**осподи, мимоходя путем, обрел еси человека слепа от рождения, и удивлени бывше ученицы, вопрошаху Тя глаголюще: Учителю, кто согрешит: сей ли, или родители его, да слеп родися? Ты же Спасе мой возопил еси к ним: ни сей согрешит, ни родители его, но да явятся дела Божия на нем. Мне подобает делати дела Пославшаго Мя, яже никтоже может делати. И сия рек, плюнув долу, и брание сотвори, помазал еси очи его, рек к нему: иди, умыйся в Силоамстей купили. Он же умывся здрав бысть, и вопияше к Тебе: верую Господи, и поклонися Тебе. Темже вопием и мы, помилуй нас.

**И ныне, Богородичен:**

**В** Чермнем мори, Неискусобрачныя Невесты образ написася иногда: тамо Моисей, разделитель воды, zde же Гавриил, служитель чудесе: тогда глубину шествова немокренно Израиль, ныне же Христа роди безсеменно Дева: море по прошествии Израилеве пребысть непроходно, Непорочная по Рождестве Еммануилеве пребысть нетленна. Сый и прежде Сый, явлейся, яко Человек, Боже, помилуй нас.

**Вход. Прокимен дне.**

**На литии стихира храма.**

**Слава, глас 4-й:**

**В**се житие слепый ношь помышляя, возопи к Тебе: Господи, отверзи ми зеницы, Сыне Давидов Спасе наш, да со всеми и аз воспую Твою силу.

**И ныне: Богородичен, глас тойже:**

**П**ризри на моления Твоих раб, Всенепорочная, утоляющи лютая на ны востания, всякия скорби нас изменяющи: Тя бо Едину твердое и известное утверждение имама, и Твое предстательство стяжахом, да не постыдимся Владычице, Тя призывающи. Потщися на умоление, Тебе верно вопиющих: радуйся Владычице, всех Помоще, Радосте и Покрове, и Спасение душ наших.

**На стиховне стихира воскресна, глас 5-й:**

**Т**ебе, воплощеннаго Спаса Христа, и небес не разлучившася, во гласех пеней величаем: яко Крест и смерть приял еси за род наш, яко Человеколюбец Господь, испровергий адова врата, тридневно воскресл еси, спасая души наша.

**И прочая стихиры Пасце, глас 5-й:**

**Стих:** Да воскреснет Бог и расточатся врази Его.

**Пасха** священная нам днесь показася: \* Пасха нова святая: \* Пасха таинственная: \* Пасха всечестная: \* Пасха Христос Избавитель: \* Пасха непорочная: \* Пасха великая: \* Пасха верных: \* Пасха, двери райския нам отверзающая: \* Пасха, \* всех освящающая верных.

**Стих:** Яко исчезает дым, да исчезнут.

**Приидите** от видения, \* жены благовестницы, \* и Сиону рцйте: \* прими от нас радости благовещения \* Воскресения Христова: \* красуйся, ликуй \* и радуйся, Иерусалиме, \* Царя Христа узрев из гроба, \* яко жениха происходяща.

**Стих:** Тако да погибнут грешницы от Лица Божия, а праведницы да возвеселятся.

**Мироносицы** жены, \* утру глубоку \* предсташа гробу Живодавца, \* обретоша Ангела \* на камени сядяща, \* и той, провещав им, \* сиче глаголаше: \* что ищите Живаго с мертвыми? \* Что плачете Нетленного во тли? \* Шедше, \* проповедите учеником Его.

**Стих:** Сей день, егоже сотвори Господь, возрадуемся и возвеселимся в онь.

**Пасха** красная, \* Пасха, Господня Пасха! \* Пасха всечестная нам возсия. \* Пасха! \* Радостию друг друга обьемем. \* О Пасха! \* Избавление скорби, \* ибо из гроба днесь, \* яко от чертога, \* возсияв Христос, \* жены радости исполни, глаголя: \* проповедите апостолом.

**Слава, глас 8-й:**

**Правды** Солнце мысленное Христе Боже, из утробы света лишенного, Твоим пречистым прикосновением просветившее обоюду, и наши очи душевныя озарившее, сыны дне покажи, да верою воишем Ти: многое Твое и неизреченное, еже на нас благоутробие, Человеколюбче, слава Тебе.

**И ныне, глас 5-й:**

**Воскресения** день, \* и просветимся торжеством, \* и друг друга обьемем. \* Рцем: братие, \* и ненавидящим нас \* простим вся Воскресением \* и тако возопиим: \* Христос воскрес из мертвых, смертию смерть поправ и сущим во гробех живот даровав.

**Таже отпустительный тропарь, глас 5-й:**

**Собезначальное** Слово Отцу и Духови, от Девы Рождаемое на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим.

**Слава, и ныне, глас 5-й:**

**Богородичен:** Радуйся, Двере Господня непроходимая. Радуйся стено и Покрове притекающих к Тебе. Радуйся необуреваемое пристанище и Неискусобрачная, Рождающая плотию Творца Твоего и Бога: молящи не оскудевай о воспевающих, и кланяющихся Рождеству Твоему.

## НА УТРЕНИ

На Бог Господь, тропарь воскресен, глас 5-й:

Собезначальное Слово Отцу и Духови, от Девы Рождающееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим. [Дважды]

Слава, и ныне, глас тойже:

**Богородичен:** Радуйся, Двере Господня непроходимая. Радуйся стено и Покрове притекающих к Тебе. Радуйся необуреваемое пристанище и Неискусобрачная, Рождающая плотию Творца Твоего и Бога: молящи не оскудевай о воспевающих, и кланяющихся Рождеству Твоему.

По 1-м стихословии, седальны воскресны, глас 5-й:

Крест Господень похвалим, погребение святое песньми почтим, и Воскресение Его препрославим: яко совозмоги мертвыя от гроб яко Бог, пленив смерти державу, и крепость диаволу, и сущым во аде свет возсия.

**Стих:** Воскресни Господи Боже мой, да вознесется рука Твоя не забуди убогих Твоих до конца.

Господи, мертв нареклся еси умертвивый смерть, во гробе положился еси, истощивый гробы: горе воини гроб стражу, доле от века мертвыя воскресил еси, Всесильне и непостижимо Господи слава Тебе.

Слава, и ныне,

**Богородичен:** Радуйся святая горо и богопроходная, радуйся одушевленная купино и неопалимая, радуйся едина к Богу мирови мосте, преводяй смертныя к вечному животу. Радуйся нетленная Отроковице, неискусомужно рождающая Спасение душ наших.

По 2-м стихословии седален, глас 5-й

Господи, посреде Тя осужденных пригвоздиша беззаконнии, и копием ребро Твое прободоша, о Милостиве! Погребение бо приял еси, разрушивый ада врата, и воскресл еси тридневно: притекоша жены видети тя, возвестиша апостолом востание. Превозносимый Спасе Егоже поют ангели, благословенный Господи, слава Тебе.

**Стих:** Исповеся Тебе Господи всем сердцем моим, повею вся чудеса Твоя.

Странное Твое Спасе мой, таинство, мирови спасение бысть: воскрес бо от гроба боголепно, истлевших совоздвигл еси яко Бог, всех Животе, Господи слава Тебе.

Слава, и ныне:

**Богородичен:** Неискусобрачная Мати, Богородительнице Чистая, Евину печаль обрадовавшая, воспеваем вернии, и покланяемся Тебе, яко возвела еси нас от древния клятвы: и ныне моли непрестанно, Всепетая Пресвятая, во еже спастися нам.

**По Блажени непорочнии:** глаголем тропари воскресны: **Благословен еси Господи: во глас 5-й: Ангельский собор: и прочее.**

**И абие ипакои, глас 5-й:**

**Ангельским зраком ум смущающыя, и Божественным востанием душою просвещаемыя мироносицы, апостолом благовествоваху:** возвестите во языцех Воскресение, Господу содействующу чудеса, подающему нам велию милость.

**Степенна, глас 5-й: Антифон 1:**

**Внегда скорбети мне, давидски пою Тебе Спасе мой:** избави душу мою от языка льстиваго.

**Пустынным живот блажен есть, божественным рачением воскриляющымся.**

**Слава и ныне:** Святым Духом одержатся вся, видимая же с невидимыми, самодержавен бо сый, Троицы Един есть неложен.

**Антифон 2:**

**На горы душе, воздвигнемся, гряди тамо, отнюдуже помощь идет.**

**Десная Твоя рука, и мене Христе касающаяся, от лести всякия да сохрани.**

**Слава и ныне:** Святому Духу богословяще рцем: Ты еси Бог, Живот, рачение, свет, ум: Ты благостыня, Ты царствуеши во веки.

**Антифон 3:**

**О рекших мне, во дворы внидем Господни:** радости многия исполнен быв, молитвы возсылаю.

**В дому Давидове страшная совершаются:** огонь бо тамо паля всяк срамный ум.

**Слава: И ныне:** Святому Духу живоначалное достоинство, от Негоже всякое животно одушевляется, яко во Отце, купно же и Слове.

**Прокимен, глас 5:** Воскресни Господи Боже мой, да вознесется рука Твоя, \* яко Ты царствуеши во веки.

**Стих:** Исповемся Тебе Господи всем сердцем моим:

**Евангелие Иоанна, зачало 64:**

Мариа стояше у гроба:

**Таже:** Воскресение Христово: [Трижды]. Псалом 50: Канон пасце, со ирмосы и с богородичными на 8: и слепаго на 6.

**Канон пасце, глас 1-й:**

## Песнь 1.

**Ирмос:** Воскресения день, \* просветимся, людие: \* Пасха, Господня Пасха! \* От смерти бо к жизни \* и от земли к небеси \* Христос Бог нас преведе, \* победную поюция.

**Припев:** Христос воскрес из мертвых.

**О**чистим чувства \* и узрим неприступным светом Воскресения \* Христа блистающа, \* и радуйтесь рекуща, \* ясно да услышим, \* победную ноюще.

**Н**ебеса убо достойно да веселятся, \* земля же да радуется, \* да празднует же мир, \* видимый же весь и невидимый: \* Христос бо воста, веселие вечное.

### Иный канон Богородичен:

**У**мерщвления предел сломила еси, вечную жизнь рождающая Христа, из гроба возсиявшего днесь, Дево Всенепорочная, и мир просветившего.

**В**оскресшего видевши Сына Твоего и Бога, радуйся со апостолами Богоблагодатная Чистая: и еже радуйся первее, яко всех радости вина, восприяла еси, Богомати Всенепорочная.

### Иный канон о слепом, глас 5-й:

**Ирмос:** Землю, на нюже не возсия, \* ни виде солнце когда, \* бездну, юже не виде нагу широта небесная, \* Израиль пройде невлажно, \* Господи, и ввел еси его в гору святыни Твоя, \* хваляща и поюща победную песнь.

**Р**аспятие вольное восприим Спасе плотию, источил еси благословение, и жизнь миру Владыко, едине Всеблагословенне, и всех Содетелю. Темже благословим Тя, поем и славим, поюще, воспевающе победную песнь.

**В** рове Тя преисподнейшем мертва бывша Христе, положи благообразный Иосиф, и привали к дверем гроба камень, Долготерпеливе. Но воскресл еси славне, и мир совозоставил еси поющий, воспевающий победную песнь.

**М**ира что приносите со слезами вы, глаголаше честным женам ангел явлейся? Христос воста: текше рцете боговидцем учеником, рыдающим и плачущим, яко да възграют и ликуют светло.

**Ч**удеса преславная сотворяя, Избавитель исцели и слепа от рождения, брением помазав, и рек: иди умойся в Силоаме, яко да познаеши Мя Бога по земли шествующа, плоть носяща, за милосердие щедрот.

**Слава: троичен:** Единое Троицостасное Существо почитающе вернии, прославим Отца, и Сына, и Духа праваго, Творца, и Господа, и Избавителя всех, единого несозданного со безплотными зывающе: Свят, Свят, Свят еси Царю.

**И ныне: Богородичен:** Во утробу неискусобрачную Твою вселися Чистая Господь, за милосердие щедрот, спасти хотя человека истлевшего козными вражними. Того убо моли, град сей спасти от всякаго пленения, и врагов нашествия.

**Катавасия:** Спасителю Богу, \* в мори люди немокрыми ногами наставльшему, \* и фараона со всевоинством потопльшему, \* Тому единому поим, \* ко прославися.

### Песнь 3.

**Ирмос:** Приидите, пиво пием новое, \* не от камене неплодна чудодеемое, \* но нетления источник, \* из гроба одождивша Христа, \* в Немже утверждаемся.

**Н**ыне вся исполнишася света, \* небо же и земля, и преисподняя: \* да празднует убо вся тварь \* востание Христово, \* в немже утверждается.

**В**чера спогребохся Тебе, Христе, \* совостаю днесь воскресшу Тебе, \* сраспинахся Тебе вчера. \* Сам мя спрослави, Спасе, \* во Царствии Твоем.

### Богородичен:

**Н**а нетленную жизнь прихожду днесь благостию Рождшагося из Тебе Чистая, и всем концем свет облиставшаго.

**Б**ога Егоже родила еси плотию, из мертвых, якоже рече, воставша видевши Чистая, ликуй, и Сего яко Бога Пречистая возвеличай.

### Ин. о слепом,

**Ирмос:** Движимое сердце мое Господи, \* волнами житейскими, \* утверди, во пристанище тихое \* наставляя яко Бог.

**К**олеблющихся сердца утвердил еси, землю всю поколебав Долготерпеливе, честным распятием Твоим еже претерпел еси плотию.

**В** новем гробе Тебе положи Щедре, Иосиф благообразный, воскресл же еси из мертвых тридневен новосотворивый нас.

**Ч**то яко мертва ищите Господа? Воскресе, якоже рече ангел женам вещаше, блистаяся божественным зраком.

**С**лепа иногда от рождения, приступльша к Тебе исцелил еси Всещедре, славяща смотрение Твое и чудеса.

**Слава: Троицен:** Богу Отцу покланяемся Пребезначальному, и Сыну, и Божественному Духу, Тринесозданному Естеству, Триипостасному, Единому Богу всех.

**И ныне: Богородичен:** Из чрева девическа родила еси Бога воплощенна, Емуже молися Всесвятая Владычице, ущедрити нас.

**Катавасия:** Силою Креста Твоего Христе, \* утверди мое помышление, \* во еже пети и славити \* спасительное Твое Вознесение.

Таже кондак Пасхи, глас 8-й:

**А**ще и во гроб снизшел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтесь, \* и Твоим апостолом мир даруй, падшим подай воскресение.

**Икос:** **Е**же прежде солнца Солнце зашедшее иногда во гроб, предвариша ко утру, ищущия яко дне мироносицы девы, и друга ко друзей вопияху: о другини, приидите, вонями помажем Тело живоносное и погребенное, плоть Воскресившаго падшаго Адама, лежащую во гробе. Идем, потщимся, якоже волсви, и поклонимся, и принесем мира яко дары, не в пеленах, но в плащанице обвитому, и плачим, и возопиим: о Владыко, востани, падшим подай воскресение.

**Таже седален, глас 8-й:**

**Подобен:** Премудрости:

**В**сех Владыка и Творец преходя, обрете на пути слепа сидяща, плачуща и глаголюща: не видех в житии солнца сияюща, ниже луны света озаряющаго. Темже вопию Ти: рождейся от Девы, просвещей всяческая, просвети мя яко благоутробен, да зову припадая Тебе Владыко Христе Боже: прегрешений оставление даруй, за множество милости нам Человеколюбче.

**Слава, и ныне: тойже.**

**Песнь 4.**

**Ирмос:** **На Божественной стражи \* богоглаголивый Аввакум \* да станет с нами и покажет \* светоносна Ангела, \* ясно глаголюща: \* днесь спасение миру, \* яко воскресе Христос, \* яко Всесилен.**

**М**ужеский убо пол, \* яко разверзый девственную утробу, \* явися Христос: \* яко человек же, \* Агнец наречеса: \* непорочен же, \* яко невкусен скверны, \* наша Пасха, \* и яко Бог истинен \* совершен речеса.

**Я**ко единолетний агнец, \* благословенный нам венец Христос, \* волею за всех заклан бысть, \* Пасха очистительная, \* и паки из гроба красное \* правды нам возсия Солнце.

**Б**огоотец убо Давид, \* пред санным ковчегом \* скакаше играя, \* людие же Божии святии, \* образов сбытие зряще, \* веселимся Божественне, \* яко воскрес Христос, \* яко Всесилен.

**Богородичен тойже:**

**С**оздавый Адама Твоего праотца Чистая, зиждется от Тебе, и смертное жилище разори Своею смертию днесь, и озари вся Божественными блистаньями Воскресения.

**Е**гоже родила еси Христа, прекрасно из мертвых возсиявша Чистая зрящи, добрая и Непорочная в женах и красная, днесь во спасение всех, со апостолы радующися Того прославляй.

Ин. о слепом,

**Ирмос:** Услышах Господи слух Твой, \* и убояхся, \* разумех смотрение Твое, \* и прославих Тя, едине Человеколюбче.

Умерша мя древом, пожрен быв Спасе мой, жизнь сый оживил еси, за великую милость: сего ради Слове славлю Тя.

Учеником Господи, соводворяяся преславно, сим глагола еси: идите, проповедите всюду Мое Воскресение.

Уверяя Господи, востание Твое, еже из гроба, любящим Тя Христе, во дни многи соводворился еси, радость творя им.

Воочил еси Господи, слепа из утробы рожденна, рек: иди, умыйся, и прозри, Мое славя Божество.

**Слава: Троицен:** Единочестная, безначальная Троице, нераздельная Существом, раздельна Ипостасьми, спасай вся верно Тя страхом славящия.

**И ныне: Богородичен:** Рождество Твое Чистая еже паче естества славословим блажаще верно Тебе Пренепорочная, яко Бога всех Родительницу.

**Катавасия:** Услышах слух силы Креста, \* яко рай отверзся им, \* и возопих: \* слава силе Твоей Господи.

Песнь 5.

**Ирмос:** Утренюем утреннюю глубоку \* и вместо мира песнь принесем Владыце, \* и Христа узрим правды Солнце, \* всем жизнь возсияюща.

Безмерное Твое благоутробие, \* адовыми узами содержимии зряще, \* к свету идяшу, Христе, \* веселыми ногами, \* Пасху хваляще вечную.

Приступим, священоснии, \* исходящу Христу из гроба, яко жениху, \* и спразднуем любопрзднственными чинми \* Пасху Божию спасительную.

**Богородичен:**

Просвещается Божественными лучами и живоносными Воскресения Сына Твоего, Богомати Пречистая, и радости исполняется благочестивых собрание.

Не разверзла еси врата девства в воплощении, гроба не разрушил еси печатей Царю создания: отонудуже воскресшаго Тя зрящи Мати, радовашеся.

Ин. о слепом,

**Ирмос:** Окаянную душу мою, \* ношеборющуюся со тмою страстей, \* предварив ущедри, \* и возсияй мысленное солнце, \* днесветлыя звезды во мне, \* во еже разделить ночь от света.

Вознеслся еси на Древо Щедре, и совознесл еси вся человеки, и борителя змия умертвил еси, и оживил еси создание рук Твоих, яко един Бог всех.

Положился еси во гробе волею Царю Безсмертне, и царствия адова вся истощил еси, мертвыя Воскресением Твоим воздвигнув.

**Ч**удеса велия соделовающаго Слове на земли, людие убиша Тя беззаконнии: но Сам Господи, един всесилен сый, якоже предрекл еси, из мертвых воскресл еси Христе.

**О**чи отверзл невидевшаго свет чувственный, души просветил еси зеницы, и славити сотворил еси сего, познавша Тя Творца, за благоутробие явившася человека.

**Слава: Троицен:** Троицу во Единице, и в Троице Единицу вернии славословим вси, Отца и Сына, и Духа Праваго, единого Бога, Содетеля всех воистинну.

**И ныне: Богородичен:** Како родила еси богоблагодатная Дево Мати Чистая, не познавши искуса мужеска? Како питаеши Питающаго всю тварь? Якоже един весть Сам, всех Творец и Бог.

**Катавасия: У**треннююще вопием Ти \* Господи, спаси ны: \* Ты бо еси Бог наш, \* разве бо Тебе иного не знаем.

#### Песнь 6.

**Ирмос:** Снизшел еси в преисподняя земли \* и сокрушил еси верей вечных, \* содержащая связанных, Христе, \* и тридневен, яко от кита Иона, \* воскресл еси от гроба.

Сохранив цела знамения, Христе, \* воскресл еси от гроба, \* ключи Девы не вредивый в рождестве Твоем, \* и отверзл еси нам райския двери.

Спасе мой, \* живое же и нежертвенное зачатие, \* яко Бог Сам Себе \* волею привел Отцу, \* совоскресил еси всероднаго Адама, \* воскрес от гроба.

#### Богородичен:

Возведся древле держимое смертию и тлением, воплотившимся от Твоего пречистаго чрева, к нетленной, и присносущней жизни, Богородице Дево.

Сниде в преисподняя земли, в ложесна Твоя Чистая спешдый, и вселившийся и воплотившийся паче ума, и воздвиже с Собою Адама, воскрес от гроба.

#### Ин. о слепом,

**Ирмос:** Якоже пророка от зверя избавил еси Господи, \* и мене из глубины несодержимых страстей возведи, \* молюся, да приложу призрети ми \* ко храму святому Твоему.

Распныйся с разбойники Владыко, избавил еси от разбойник лукавых, душетленных страстей, Человеколюбче Господи, вся поющыя Твое распятие, и востание согласно.

Положиша без дыхания Тебе мертва, Христе, во гробе, всем мертвым вдыхающа жизнь: воскресл же еси Господи, вся истощивый Слове гробы, Божественною Твоею силою.

**По** востании Христе, другом глагола еси: сядите убо во Иерусалиме, дондеже облечетеся силою свыше непобедимою, и известною помощию.

**Брение** сотвори, очи слепаго от рождения помазал еси, и даровал еси ему прозрети, поющу Твою Слове неизреченную силу, еюже спас еси мир.

**Слава: Троицен: Триипостасная** Единице, Отче нерожденне, Сыне рожденне, и Душе исходне, Трисвятый Господи, едино Существо и сила, спасай вся люди Твоя.

**И ныне: Богородичен: Величия** Твоя, Чистая, кто исповестъ? Бога бо плотию родила еси преестественно, мир Тобою избавляющаго, Дево Всенепорочная, от всякаго греха.

**Катавасия: Обыде** мя бездна, гроб мне кит бысть: аз же возопих к Тебе Человеколюбцу, и спасе мя десница Твоя, Господи.

**Кондак, глас 4-й: Подобен: Явился** еси днесь:

**Душевными** очима ослеплен, к Тебе Христе прихожду, якоже слепый от рождения, покаянием зову Ти: Ты сущих во тме свет пресветлый.

**Икос: Струю** ми даруй Христе, премудрости неизреченныя, и разума горняго, Свете сущих во тме, и прельщаемых Наставниче, да возмогу чудеса Твоя поведати окаянный, яже Божественная книга научи Евангелиа мира, сиестъ, слепаго чудотворение: яко от рождения слеп сый, очи чувственныя приемлет и душевныя, верою взывая: Ты сущих во тме свет пресветлый.

### **Песнь 7.**

**Ирмос: Отроки** от печи избавивый, \* быв Человек, \* страждет яко смертен, \* и страстию смертное \* в нетления облачит благолепие, \* Един благословен \* отец Бог и препрославлен.

**Жены** с миры богомудрыя \* в след Тебе течаху: \* Егоже, яко мертва, со слезами искаху, \* поклонишася радующияся Живому Богу, \* и Пасху тайную \* Твоим, Христе, \* учеником благовестиша.

**Смерти** празднуем умерщвление, \* адово разрушение, \* иного жития, вечнаго, начало, \* и играюще поем Виновнаго, \* Единого благословеннаго \* отец Бога \* и препрославленнаго.

**Яко** воистинну священная \* и всепразднственная сия спасительная ночь, \* и светозарная, \* светоноснаго дне, \* востания суци провозвестница: \* в нейже безлетный Свет \* из гроба плотски всем возсия.

### **Богородичен:**

**Умертвив** Сын Твой смерть, Всенепорочная днесь, всем смертным пребывающий живот во веки веков дарова, един благословенный отец Бог и препрославленный.

**В**сем царствуяй созданием, быв Человек, вселися в Твою Богоблагодатная утробу, и распятие претерпев и смерть, воскрес Боголепно, совозставив нас яко всемоу.

**Ин. о слепом,**

**Ирмос:** Огня гасилище отроков молитва, \* орошающая печь проповедница чудесе, \* не опаляющи, ниже сожигающи, \* песнословцы Бога отец наших.

**В**оздвижену Тебе на Древо Спасе, погасе солнце, земля волнушеса, колебашеса тварь вся, и от гроб мертвии востаяху.

**В**оставшу ти из мертвых Царю, души совозсташа тамо спящия, славящия силу Твою, еуже смертныя узы разрешишася.

**Р**ано миропомазати Тя женский прииде лик, уведевше же Господи воставша Тя, радовахуса со священными ученики: имиже подаждь нам очищение зол.

**Б**рением помазал еси очи слепаго, и сему повелел еси к Силоаму ити, омывся же прозре, песнословя Тя Христе, Царю всех.

**Слава: Троицен: О**тца безначальна, собезначальна же Сына, и Духа Пресвятаго песнословим: Свят, Свят, Свят еси Боже, Царю всех.

**И ныне: Богородичен: П**о рождестве Дева явилася еси Чистая, Бога бо родила еси, обновившаго естества Пречистая силою Своею: Егоже моли спастися всем нам.

**Катавасия: В** печи огненной \* песнословцы \* спасый отроки, \* благословен Бог отец наших.

**Песнь 8.**

**Ирмос:** Сей нареченный и святой день, \* Един суббот Царь и Господь, \* праздников праздник \* и торжество есть торжеств: \* вонже благословим Христа во веки.

**П**риидите, новаго винограда рождения, \* божественнаго веселия, \* в нарочитом дни Воскресения \* Царствия Христова приобщимся, \* поюще Его \* яко Бога во веки.

**В**озведи окрест очи твои, Сионе, и виждь: \* се бо приидоша к тебе, \* яко богосветлая светила, \* от запада и севера, и моря, \* и востока чада твоя, \* в тебе благословящия Христа во веки.

**О**тче Вседержителю, и Слове, и Душе, \* трети соединяемое во Ипостасех Естество, \* Пресущественне и Пребожественне, \* в Тя крестихомся и Тя благословим во вся веки.

**Богородичен**

**П**рииде Тобою в мир Господь Дево Богородице, и чрево адово расторг, смертным нам воскресение дарова: темже благословим Его во веки.

**В**сю низложив смерти державу Сын Твой Дево, Своим Воскресением, яко Бог крепкий совознесе нас и обожил: темже воспеваем Его во веки.

**Ин. о слепом,**

**Ирмос: Ангелов сонм, человеков собор, \* Царя и Зиждителя всех, \* священницы пойте, благословите левити, \* людие превозносите во вся веки.**

**А**нгельстии чинове на Кресте Тя видевшие висима Христе Всецарю, и тварь всю изменяюща страхом, ужасошася поюще Твое человеколюбие.

**А**д доле Тебе видево стеньше, и подаваше скоро мертвыя от века тамо хранимыя, Христе, песнословящия Твое человеколюбие.

**С**отворя чудеса Христе изрядная, волею воздвижен был еси на Крест, и с мертвыми совокупился еси умертвивый ада, и вся мужеством отрешил еси узники.

**С**лепаго воочил еси к Тебе приступивша Христе, сему повелевый в Силоамову купель ити, омыться и прозрети, и Бога Тя проповедати, плотию явившагося во спасение мира.

**Благословим Отца, и Сына, и Святаго Духа, Господа.**

**Троицен: Т**роице нераздельная, Единице неслиянная, Боже всяческих и Зиждителю всех, песнословящия и верно покланяющияся державе Твоей, от всяких искушений спасай.

**И ныне: Богородичен: Д**ево Пречистая, богоблагодатная, Твоего моли Сына всегда, да не посрамит мя в день осуждения, но сочтет избранным овцам.

**Таже: Х**валим, благословим, покланяемся Господеви:

**Катавасия: Из** Отца прежде век рожденного Сына и Бога, \* и в последняя лета воплощенного от Девы Матере, \* священницы пойте, \* людие превозносите во вся веки.

**Ч**естнейшую не стихословится:

**Песнь 9.**

**Ирмос: С**ветися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

**О** Божественнаго, о любезнаго, \* о сладчайшаго Твоего гласа! \* С нами бо неложно \* обещался еси быти \* до скончания века, Христе: \* Егоже, вернии, \* утверждение надежды имуще, радуемся.

**О** Пасха велия и священнейшая, Христе! \* О мудросте и Слове Божий, и сило! \* Подавай нам истее Тебе причащатися \* в невечернем дни Царствия Твоего.

**Богородичен:**

**С**огласно Дево, Тебе блажим вернии: радуйся двере Господня: радуйся граде одушевленный: радуйся, Еяже ради нам ныне возсия свет, из Тебе Рожденного из мертвых Воскресения.

**В**еселися и радуйся божественная двере Света: зашедый бо Иисус во гроб возсия, просияв солнца светлее, и верныя вся озарив, Богорадованная Владычице.

**Ин. о слепом,**

**Ирмос: Я**ко сотвори Тебе величия Сильный, \* Деву явль Тя чисту по рождестве, \* яко рождшую без семене Своего Творца: \* тем Тя Богородице величаем.

**Н**а Древе крестнем пригвоздился еси Христе Боже, и вся победил еси вражия сопротивная начала, и первую клятву потреби еси Спасе: темже Тя по долгу величаем.

**Я**ко виде Тя Слове, ад доле с душею, воздохну, и вся мертвыя страхом отрещи, познавшыя державу власти Твоея: темже Тя по долгу величаем.

**З**намения сотворяюща, и чудеса страшная, собор еврейский зря, завистию уби пленившаго ад Воскресением Своим, и всех яко силен возставляющаго.

**В**остал еси, якоже рекл еси, Животодавче из мертвых, и явился еси святым учеником по востании, знамения сотворивый, и воочивый слепыя: с ними же Тя во веки величаем.

**Слава: Троицен: С**вет Отца чту, Свет славаю и Сына, Свет воспеваю Духа Праваго, един Свет нераздельный, в триех Лицах разумеваемый, Бога Царя всея твари.

**И ныне: Богородичен: Я**вившиися пространнейшая небес Дево Чистая, вместила еси плотию Бога неописаннаго, и родила еси всех Избавление, верою несумненною воспевающих Тя.

**Катавасия: Т**я паче ума и словесе Матерь Божию, \* в лето Безлетнаго \* неизреченно рождшую, \* вернии единомудренно величаем.

**Екзапостилларий, Пасхи. Самогласен:**

**П**лотию уснув, \* яко мертв. \* Царю и Господи, \* тридневен воскресл еси, \* Адама воздвиг от тли \* и упразднил смерть: \* Пасха нетления, \* мира спасение.  
[Единожды]

**Слава: слепаго. Подобен:**

**У**мныя мои очи ослепленные, Господи, от мрачнаго греха, Ты просвети, вложив Щедре смирение, и покаяния омый слезами.

**И ныне: Подобен: Жены услышите:**

**М**имойдый Спас наш, обрете слепа без очию, плюнув на землю и сотворив брение, помаза его, к Силоаму посла ити и умыться. Он же умывся, прииде видя свет Твой Христе мой.

**На хвалитех поставим стихов 8: И поем стихиры воскресны, глас 5-й:**

**Стих: Сотворити в них суд написан: слава сия будет всем преподобным Его.**

**Г**осподи, запечатану гробу от беззаконников, прошел из гроба, якоже родился еси от Богородицы: не уразумеша, како воплотился еси, безплотнии Твои ангели. Не чувствоваша, когда воскресл еси, стрегущии Тя воини: обоя бо запечатлешася испытующым, явишася же чудеса покланяющимся верою таинству: еже воспевающим воздаждь нам радость и велию милость.

**Стих: Хвалите Бога во святых Его, хвалите Его во утверждении силы Его.**

**Г**осподи, верей вечныя сокрушивый, и узы растерзавый, от гроба воскресл еси, оставль Твоя погребальная, во свидетельство истиннаго тридневнаго Твоего погребения: и предварил еси в галилеи, в пещере стрегомый: великая Твоя милость, непостижимо Спасе, помилуй, и спаси нас.

**Стих: Хвалите Его на силах Его, хвалите Его по множеству величества Его.**

**Г**осподи, жены текоша на гроб видети Тя Христа, нас ради пострадавшаго: и пришедше обретоша ангела на камени сядяща, страхом отвальшемся, и к ним возопи глаголя: воскресе Господь, рцйте учеником, яко воскресе от мертвых, спасаяй души наша.

**Стих: Хвалите Его во гласе трубнем: хвалите Его во псалтири и гуслех.**

**Г**осподи, якоже изшел еси от запечатаннаго гроба, тако вшел еси и дверем заключенным ко учеником Твоим, показуя им телесная страдания, яже подъял еси Спасе долготерпевый: яко от семени давидова язвы претерпел еси: яко Сын же Божий мир свободил еси: великая Твоя милость, непостижимо Спасе, помилуй, и спаси нас.

**Ины стихиры анатолиевы:**

**Стих:** Хвалите Его в тимпане и лице, хвалите Его во струнах и органе.

Господи, Царю веков, и Творче всех, нас ради распятие и погребение плотию приемый, да нас от ада свободиши всех. Ты еси Бог наш, разве Тебе иного не вемы.

**Стих:** Хвалите Его в кимвалех доброгласных:

Господи, пресияющая Твоя чудеса кто исповестъ? Или кто возвестит страшная Твоя таинства? Вочеловечивыйся бо нас ради яко Сам восхотел еси державу явил еси силы Твоея. Крестом бо Твоим разбойнику рай отверзл еси, и погребением Твоим верей адовы сокрушил еси: Воскресением же Твоим всяческая обогатил еси, Благоутробне Господи, слава Тебе.

**Стих:** Воскресни Господи Боже мой, да вознесется рука Твоя:

Миросицы жены гроба Твоего достигше, зело рано искаху Тебе миры помазати, безсмертнаго Слова и Бога, и ангела глаголы огласившеся, возвращахуся радостию, апостолом возвестити яве: яко воскресл еси Животе всех, и подал еси миру очищение, и велию милость.

**Стих:** Призри на мя, и помилуй мя.

**Самогласен слепаго, глас 8-й:**

За милосердие милости воплотивыйся Христе Боже, света лишеннаго от утробы, милосердием неизреченных щедрот, сияния Божественнаго сподобил еси, сего зеницам перстию создательными персты Твоими прикоснувшийся: Сам и ныне Светодателю, и наша озари душевная чувства, яко един независтнодатель.

**Слава: глас 8-й:**

Кто возглаголет силы Твоя Христе? Или кто изочтет чудес Твоих множества? Сугуб бо яко виден был еси на земли за благодать, сугубы и цельбы недугующим подавал еси: не точию бо телесныя очи отверзл еси, иже от утробы слепому, но и душевныя: темже Бога Тя исповедаше таящагося, и всем подающе велию милость.

**И ныне:** Преблагословенна еси:

**Славословие великое. И отпуст.**

**Слава, и ныне, стихира евангельская, глас 8-й:**

Мариины слезы не все проливаются тепле: се бо сподобися и учащих ангелов, и видения Самаго Иисуса: но еще земная мудрствует, яко жена немощная. Темже и отсылается не прикасаться Христу: но обаче проповедница посылается Твоим учеником: им же благовествование носящи, еже ко Отческому жребию восход возвещает. с нею же сподоби и нас явления Твоего Владыко Господи.

И час 1. И конечный отпуст.

## НА ЛИТУРГИИ

**Блаженна, гласа на 4: И от канона слепаго, песнь 6 на 4.**

**Разбойник** на Кресте Бога Тя быти веровав, Христе, исповеда Тя чисте от сердца: помяни мя Господи, вопия, во Царствии Твоем.

**Иже** на Древе крестнем жизнь процветшаго роду нашему, и иссушивша юже от древа клятву, яко Спаса и Содетеля согласно воспоим.

**Распеншемся** Тебе Христе, посреде двою осужденною разбойнику, един убо хуля Тя, осужден бысть праведне: другой же исповеда Тя, в рай вселися.

**Ко** апостолов лику пришедшья жены честныя возопиша: Христос воскрес, яко Владыце и Содетелю Тому поклонимся.

**Распныйся** с разбойники Владыко, избавил еси от разбойник лукавых, душетленных страстей, Человеколюбче Господи, вся поющья Твое распятие, и востание согласно.

**Положиша** без дыхания Тебе мертва, Христе, во гробе, всем мертвым вдыхающа жизнь: воскресл же еси Господи, вся истощивый Слове гробы, Божественною Твоею силою.

**Слава: Троицен: Трипостасная** Единице, Отче нерожденне, Сыне рожденне, и Душе исходне, Трисвятый Господи, едино Существо и сила, спасай вся люди Твоя.

**И ныне: Богородичен: Величия** Твоя, Чистая, кто исповесть? Бога бо плотию родила еси преестественно, мир Тобою избавляющаго, Дево Всенепорочная, от всякаго греха.

**По входе тропарь воскресен. глас 5-й:**

**Собезначальное** Слово Отцу и Духови, от Девы Рождающееся на спасение наше, воспоим вернии и поклонимся, яко благоволи плотию взыти на Крест, и смерть претерпети, и воскресити умершья славным Воскресением Твоим.

**Слава: Кондак слепаго, глас 4-й:**

**Душевными** очима ослеплен, к Тебе Христе прихожду, якоже слепый от рождения, покаянием зову Ти: Ты сущих во тме свет пресветлый.

**И ныне: Кондак Пасхи, глас 8-й:**

**Аще** и во гроб снишел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтесь, \* и Твоим апостолом мир даруйай, падшим подай воскресение.

Прокимен, глас 8-й: Помолитесь и воздадите Господеву Богу нашему.

Стих: Ведом во Иудеи Бог, во Израили велие имя Его.

Апостол деяний, зачало 38:

Во дни оны, бысть идущим апостолом на молитву, отроковица некая имущая дух пытлив сrete нас, яже стяжание много даяше господем своим волхвующи. Та последовавши Павлу и нам, взываше глаголющи: сии человецы раби Бога Вышняго суть, иже возвещают нам путь спасения. Се же творяше на многи дни. Стужив же си Павел, и обратся, духови рече: запрещаю ти именем Иисуса Христа, изыди из нея: и изыде в том часе. Видевше же господие ея, яко изыде надежда тяжания их, поемше Павла и Силу, влекоша на торг ко князем. И введше их к воеводам, реша: сии человецы возмущают град наш, иудее суще. И завещавают обычаи, яже не достоин нам приимати, ни творити, римляном сущим. И снидесе народ на них, и воеводы растерзавше им ризы, веляху палицами бити их. Многи же давшше им раны, всадиша в темницу, завещавше темничному стражу твердо стрепци их. Иже таково завещание прием, всади их во внутреннюю темницу, и ноги их заби в кладе. В полунощи же Павел и Сила молящася пояста Бога: послушаху же их юзницы. Внезапу же трус бысть велий, яко поколебатися основанию темничному: отверзоша же ся абие двери вся, и всем юзы ослабеша. Возбуждъся же темничный страж, и видеv отверсты двери темницы, извлек нож, хотяше себе убити, мня избегша юзники. Возгласи же гласом велиим Павел, глаголя: ничтоже сотвори себе зла, вси бо есмы zde. Просив же свещи, вскочи, и трепетен быв, припаде к Павлу и Силе. И извед их вон, рече: господие, что ми подобает творити, да спасуся? Она же рекоста: веруй в Господа Иисуса Христа, и спасешися ты, и весь дом твой. И глаголаста ему слово Господне, и всем иже в дому его. И поем я в той же час нощи, измы от ран, и крестися сам и свои ему вси абие. Введ же я в дом свой, постави трапезу, и возрадовася со всем домом своим, веровав Богу.

Аллилуиа, глас 8-й: Призри на мя, и помилуй мя.

Стих: Стопы моя направи по словеси Твоему.

Евангелие Иоанна, зачало 34:

Во время оно, мимоидый Иисус виде человека слепа от рожества. И вопрошиша Его ученицы Его, глаголюще: Равви, кто согреши; сей ли, или родителя его, да слеп родися? Отвеща Иисус: ни сей согреши, ни родителя его, но да явятся дела Божия на нем. Мне подобает делати дела Пославшаго Мя, дондеже день есть: приидет нощь, егда никтоже может делати. Егда в мире есмь, свет есмь миру. Сия рек, плюну на землю, и сотвори брение от плюновения, и помаза очи брением слепому. И рече ему: иди, умыйся в купели Силоамсте, еже

скажется послан. Иде же, и умыся, и прииде видя. Соседи же и иже бяху видели его прежде, яко слеп бе, глаголаху: не сей ли есть седяй и просяй? Овии глаголаху, яко сей есть: инии же глаголаху, яко подобен ему есть. Он же глаголаше, яко аз есмь. Глаголаху же ему: како ти отверзостеся очи? Отвеща он и рече: Человек нарицаемый Иисус брение сотвори, и помаза очи мои, и рече ми: иди в купель Силоамлю, и умыйся. Шед же и умывся, прозрех. Реша же ему: кто Той есть? Глагола: не вем. Ведоша же его к фарисеем, иже бе иногда слеп. Бе же суббота, егда сотвори брение Иисус, и отверзе ему очи. Паки же вопрошаху его и фарисее: како прозре? Он же рече им: брение положи мне на очи, и умыхся, и вижу. Глаголаху же от фарисей нецыи: несть Сей от Бога Человек, яко субботу не хранит. Овии глаголаху: како может человек грешен сицева знамения творити? И распря бе в них. Глаголаху убо слепцу паки: ты что глаголеши о Нем, яко отверзе очи твои? Он же рече, яко пророк есть. Не яша убо веры иудее о нем, яко слеп бе, и прозре, дондеже возгласиша родителя того прозревшего. И вопросиша я, глаголюще: сей ли есть сын ваю, егоже вы глаголете, яко слеп родися? Како убо ныне видит? Отвещаста же им родителя его, и реста: вемы, яко сей есть сын наю, и яко слеп родися. Како же ныне видит, не вемы: или кто отверзе ему очи, мы не вемы, сам возраст имать, самого вопросите: сам о себе да глаголет. Сия рекоста родителя его, яко боястася жидов: уже бо бяху сложилися жидове, да аще кто Его исповесть Христа, отлучен сонмища да будет. Сего ради родителя его рекоста: яко возраст имать, самого вопросите. Возгласиша же вторицею человека, иже бе слеп, и реша ему: даждь славу Богу, мы вемы, яко Человек Сей грешен есть. Отвеща же он, и рече: аще грешен есть, не вем: едино вем, яко слеп бех, ныне же вижу. Реша же ему паки: что сотвори тебе; како отверзе очи твои? Отвеща им: рекох вам уже, и не слышати: что паки хотите слышати; еда и вы ученицы Его хотите быти? Они же укориша его, и реша ему: ты ученик еси Того, мы же Моисеовы есмы ученицы. Мы вемы, яко Моисеови глагола Бог: Сего же не вемы, откуда есть. Отвеща человек, и рече им: о сем бо дивно есть, яко вы не весте, откуда есть, и отверзе очи мои. Вем же, яко грешники Бог не послушает, но аще кто богочтец есть, и волю Его творит, того послушает. От века несть слышано, яко кто отверзе очи слепу рождену. Аще не бы был Сей от Бога, не мог бы творити ничесоже. Отвещаша и реша ему: во гресех ты родился еси весь, и ты ли ны учиши? И изгнаша его вон. Услыша Иисус, яко изгнаша его вон, и обрет его, рече ему: ты веруеши ли в Сына Божия? Отвеща он, и рече: и кто есть, Господи, да верую в Него? Рече же ему Иисус: и видел еси Его, и глаголай с тобою, Той есть. Он же рече: верую, Господи, и поклонися Ему.

Вместо же Достойно, поем:

**Ирмос:** Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя

воздвигнувший: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастен: Тело Христово примите, источника безсмертнаго вкусите.

Другий: Хвалите Господа с Небес, хвалите Его в Вышних.

Служба святаго Минеи поется на Повечерии.